

13 SEP 1998

PERDANA MENTERI RASMI FESTIVAL DATARAN MERDEKA

KUALA LUMPUR, 13 Sept (Bernama) -- Perdana Menteri Datuk Seri Dr Mahathir Mohamad malam ini merasmikan Festival Dataran Merdeka yang menggabungkan Pesta Malaysia '98 dan Festival Kebudayaan Komanwel Ke-16.

Acara pembukaan berwarna-warni pesta itu turut diserikan dengan persembahan kebudayaan dari Trinidad dan Tobago, India dan Afrika Selatan selain acara hiburan oleh artis tempatan.

Festival itu yang berlangsung hingga 20 Sept itu menyediakan pelbagai acara kebudayaan dan kesenian bukan sahaja dari Malaysia tetapi juga dari Kanada, India, New Zealand, Sri Lanka, Afrika Selatan, England, Singapura, Jamaica, Australia, Cameroon dan Zimbabwe.

Pesta Malaysia menyediakan persembahan kebudayaan dan makanan dari negeri-negeri di Malaysia. Ia diadakan di Pasar Budaya, Pusat Penerangan Pelancongan Malaysia (Matic) Jalan Ampang, Kompleks Budaya Kraf, hotel dan pusat membeli-belah terkenal di ibu negara.

Negara-negara Komanwel yang menyertai Festival Kebudayaan Komanwel Ke-16 pula akan mempersembahkan pelbagai tarian, muzik dan persembahan dari negara berkenaan di Dataran Merdeka setiap malam sepanjang festival itu.

-- BERNAMA

HJ WAT